



ҚАЗАҚСТАН ҰЛТТЫҚ БАНКІ

АҚПАРАТТЫҚ ХАБАРЛАМАЛАР

21 қазан 2016 г.



ҚР Ұлттық Банкінің басшысы жұмыс сапарымен Өскемен қаласына келді

ҚР Ұлттық Банкінің Төрағасы Данияр Ақышев «Алтай Invest-2016» Халықаралық инвестициялық форумының жұмысына қатысу үшін жұмыс сапарымен Өскемен қаласына келді. Сондай-ақ ҚР ҰБ басшысы ҚР ҰБ-тың Шығыс Қазақстан филиалына және Қазақстан теңге сарайына барды, деп хабарлады реттеушінің баспасөз қызметі.

«Шығыс Қазақстанда түсті металдар кен орындарының болуы бұл өңірдің дамуының экономикалық негізін айқындады. Шығыс Қазақстан облысы республикада мырыш, титан және магнийді, сондай-ақ сирек металдарды және атом электр станцияларына арналған отынды жалғыз өндіруші. Сондықтан ол шын мәнінде еліміздің индустриялық мақтанышы болып саналады», – деп атап өтті Д. Ақышев жергілікті БАҚ өкілдеріне арналған брифинг барысында.

Оның айтуы бойынша, Шығыс Қазақстан облысының өндірілген жалпы өңірлік өнімнің 2016 жылғы 6 айдағы көлемі 1,1 трлн. теңге болды. Облыстың Қазақстан Республикасының ІЖӨ-сіндегі жалпы өңірлік өнімінің үлесі 5,8%-ды құрайды. Өнеркәсіптік өндірістің көлемі 2016 жылғы 9 айда 4,9%-ға ұлғайды.

«Облыстың банк секторы банктердің 30 филиалынан құралады. Облыстың банктеріндегі депозиттердің үлесі 2016 жылғы 8 айда 481,9 млрд. теңгеге дейін 26,8%-ға ұлғайды. Облыс бойынша инфляция 2016 жылғы қаңтар-қыркүйек аралығында 5,4%

деңгейде қалыптасты, бұл республикалық көрсеткіштен (5,6%) төмен», – деген деректерді келтірді Д. Ақышев.

Қазақстан басқа елдердің тапсырысы бойынша бағалы металдардан монеталар дайындайды

Әлемде 69 монета сарайы бар, алайда, ТМД елдерінде 3-уі ғана жұмыс істейді (Қазақстан, Ресей, Украина). Бұл туралы Өскемен қаласында жергілікті БАҚ үшін өткен брифинг барысында ҚР Ұлттық Банкінің Төрағасы Данияр Ақышев хабарлады.

Д. Ақышев Қазақстан теңге сарайының монеталарды дайындаудың толық өндірістік циклы қосылған жоғары технологиялық жабдығы бар кәсіпорын ретіндегі бірегейлігін атап өтті. «Металл өңдеу және заманауи монеталар мен қорғалған өнімді өндіру саласында бірегей біліктілігі бар қызметкерлер қалыптасқан. Бұдан басқа, ұжымның бірлігі, кәсіби дәстүрлердің сабақтастығы сақталып отыр және кейінгі қызметкерлерге баға жетпес тәжірибені беру мақсатында кадрлар дайындау жүйесі ретке келтірілген», – деді Қазақстан Ұлттық Банкінің басшысы.

Оның айтуы бойынша, өнімнің сапасы мен қызметкерлердің біліктілігі Қазақстан теңге сарайын жоғары технологиялы және бәсекеге қабілетті, оның ішінде экспортқа бағдарланған кәсіпорын ретінде тануға мүмкіндік береді. «Экспорттық қызметтер Қырғызстан, Тәжікстан және Беларусь сияқты елдерге көрсетіледі. Сондай-ақ, Германия мен Польша компанияларының тапсырыстары бойынша бағалы металдардан ұлттық валютаның монеталары дайындалады», – деп хабарлады Д. Ақышев.

Ұлттық Банк басшысы Өскеменнің журналистеріне реттеушінің ақша-кредит саясаты туралы баяндап берді

Бүгін Өскеменде жергілікті БАҚ үшін болып өткен брифинг барысында Қазақстан Ұлттық Банкінің Төрағасы Данияр Ақышев жүргізіліп жатқан ақша-кредит саясаты және еліміздің қаржы нарығындағы соңғы үрдістер туралы айтып берді.

«Ұлттық Банктің негізгі мақсаты баға тұрақтылығын қамтамасыз ету болып табылады. 2016 жылғы қыркүйектің қорытындысы бойынша инфляция 0,2%, ал жылдың басынан бастап 5,6% деңгейінде қалыптасты. Біз жылдың қорытындысы бойынша жылдың соңына таман инфляция нысаналы дәліздің жоғарғы шегі 6-8% мөлшеріне жетеді деп күтудеміз», – деп реттеушінің болжамын жеткізді Д. Ақышев.

Ол бағалардың тұрақтылығын қамтамасыз ету үшін Ұлттық Банк инфляциялық таргеттеу қағидаттарына негізделген теңгерімді ақша-кредит саясатын жүргізетінін атап өтті. Бұл ретте, теңгенің өзгермелі айырбастау бағамының режимі кезінде пайыздық саясатқа басты назар аударылады.

«Ішкі валюта нарығындағы ахуал тұрақты. Айырбастау бағамының күнделікті әрі-бері құбылуы қалыпты шектерде орын алып отыр. Сауда-саттық қорытындысы бойынша 20 қазанда бағам доллар үшін 330,56 теңгені құрады. Жылдың басынан бастап нығая 2,8%, айдың басынан бастап 1,5% болды, – деп сөзін жалғастырды Д. Ақышев. – 2016 жылғы қыркүйектен бастап Ұлттық Банк валюта нарығында өктемдік жүргізбейді, тиісінше біздің қатысу үлесіміз 0%-ды құрайды. Теңгенің бағамы қазіргі кезде оң серпінге ие орнықты факторлардың әсерінен ғана қалыптасады».

Қазақстан Ұлттық Банкінің АВР қыркүйекте 31,4 млрд. долларды құрады

Теңгенің өзгермелі бағамы саясаты елдің алтын-валюта резервтерін сақтауға ғана

емес, сонымен қатар оларды қалпына келтіру процесін бастауға мүмкіндік жасады. Ұлттық Банктің алтынвалюта резервтері қыркүйекте 2,9%-ға өсіп, 31,4 млрд. долларды құрады. Бұл туралы ҚР Ұлттық Банкінің Төрағасы Данияр Ақышев Өскеменде жергілікті БАҚ үшін өткен брифинг барысында хабарлады.

Ол сондай-ақ Ұлттық қордың валюталық активтерінің қыркүйектің қорытындысы бойынша 64,4 млрд. долларды құрағанын хабарлады. Оның айтуы бойынша елдің халықаралық резервтері 2016 жылғы қыркүйектің соңында жалпы 95,8 млрд. долларды құрады.

«Қаржы нарығындағы ахуалдың байқалып отырған жақсаруы, экономикада оң белгілердің пайда болуы және оң күтулердің қалыптасуы қазанның басында біздің базалық мөлшерлемені 12,5%-ға дейін төмендету туралы шешім қабылдау факторы болды. Тәуекелдердің төмендеуіне және экономикада байқалып отырған үрдістердің орнықтылығын растауға қарай базалық мөлшерлемені одан әрі төмендету жоққа шығарылмайды», – деп толықтырды Д. Ақышев.

Қазақстан Ұлттық Банкі басшысының Өскемен қаласына сапармен келгенін еске саламыз. Ол «Алтай Invest-2016» Халықаралық инвестициялық форумның жұмысына қатысты, сондай-ақ ҚР ҰБ Шығыс Қазақстан филиалы мен Қазақстан теңге сарайына барды.

Нарыққа қатысушылардың Ұлттық Банк саясатына деген сенімі қалпына келуде



2016 жылы Ұлттық Банк ішкі нарықтағы ақша құнына бағдар болатын кірістілік қисығын қалыптастыру үшін жағдайлар жасау бойынша белсенді жұмыс жүргізіп жатыр. Бұл жөнінде ҚР Ұлттық Банкінің Төрағасы Д.Ақышев Өскемен қаласында өткен брифингтегі сөзінде мәлімдеді.

«Бұл мақсаттар үшін қыркүйекте, 2008 жылдан бері алғашқы рет, айналыс мерзімі 1 жыл құрайтын ноттар шығарылды, оларға деген сұраныс ұсыныстан 3-4 есе асып түсті. Бұл нарыққа қатысушылардың Ұлттық Банктің жүргізіп отырған саясатына сенімінің қалпына келе бастауының және бос теңге қорларын ұзақ мерзімге орналастыруға әзірлігінің дәлелі», – деп атап өтті Д.Ақышев.

Оның айтуынша, ақша нарығында теңге өтімділігінің құрылымдық профициті сақталуда. Осыған байланысты Ұлттық Банктің артық өтімділікті алып қою бойынша операциялардың көлемі артуда. Бұл ретте артық өтімділіктің негізгі көлемі қысқамерзімді

ноттарды орналастыру арқылы реттеледі. Долларлану төмендеуде. Алдын ала деректерге сүйенсек, қыркүйекте теңгемен депозиттердің қайтадан өсуі байқалды. Банктердегі кредиттердің көлемі 2016 жылғы қыркүйекте 2015 жылдың соңындағы деңгейде дерлік сақталып, 12,7 трлн. теңгені құрады. Кредиттердің өсуі өңдеу өнеркәсібінде, ауылшаруашылығында және құрылыс саласында байқалды. Кредиттеуді одан әрі кеңейтуге жуықта болған базалық мөлшерлемені төмендету және ақша нарығындағы ресурстардың құнын тиісті тұрақтандыру ықпал ететін болады», – деп сөзін жалғастырды Д.Ақышев.

Оның айтуынша, қолайлы бизнес-ахуалдың, тұрақты экономикамен, сондай-ақ қаржы секторымен үйлескен мемлекет тарапынан инвестицияны қолдау бойынша тартымды шаралардың болуы Қазақстанға инвестицияларды табысты тартудың көзі болмақ.

Толығырақ ақпаратты мына телефондар бойынша алуға болады:

+7 (727) 2704 585

+7 (727) 2704 697

e-mail: press@nationalbank.kz

www.nationalbank.kz